



UCAPAN

YANG BERBAHAGIA

TAN SRI DR. KHAIR BIN MOHAMAD YUSOF

PENGERUSI

SURUHANJAYA PERKHIDMATAN PENDIDIKAN (SPP)

SEMPENA

PROGRAM WEBINAR KERJAYA BERSAMA

SURUHANJAYA PERKHIDMATAN PENDIDIKAN (SPP)

ANJURAN

MAJLIS DEKAN PENDIDIKAN

UNIVERSITI AWAM (UA)

19 OGOS 2021 (KHAMIS) - 9.00 PAGI

Terima kasih Saudara/Saudari Pengacara Majlis



**“Dengan nama Allah Yang Maha Pengasih lagi
Maha Penyayang”**

Assalamualaikum

Warahmatullahi

Wabarakatuh

dan Salam Sejahtera.

Yang Berbahagia Profesor

Dato' Dr. Norazah binti Mohd Nordin

Pengerusi

Majlis Dekan Pendidikan Universiti Awam

Yang Berusaha Encik Md Radzi bin Hashim

Setiausaha

Suruhanjaya Perkhidmatan Pendidilkan

Yang Berusaha Profesor Madya

Dr. Wan Zuhani binti Saad

Pengarah

**Bahagian Kecemerlangan Akademik Jabatan Pendidikan
Tinggi**

**Wakil-wakil Kementerian Pengajian Tinggi, Jabatan
Pendidikan Tinggi, Majlis Dekan Pendidikan Universiti Awam**

Seterusnya

**Graduan dan Bakal Graduan Pendidikan serta hadirin yang
dikasihi sekalian**

KALIMAT PEMBUKA

(Pantun)

Mawar Dipetik Merahnya Pekat,

Habis Dipetik Lantas Diikat ;

Doa Saya Semuanya Sihat

Kita Berkumpul Mencari Manfaat

Insya-Allah...

- 1. Setinggi-tinggi kesyukuran dirafakkan ke hadrat Allah SWT kerana atas limpah kurnianya, kita dapat bersama-sama dalam Program Webinar Kerjaya bersama Suruhanjaya Perkhidmatan Pendidikan (SPP).**
- 2. Terima kasih diucapkan kepada tuan-tuan dan puan-puan khususnya Graduan dan Bakal Graduan Program Pendidikan yang dapat menghadiri program webinar ini. Untuk makluman, sebentar lagi YBrs. Encik Md Radzi bin Hashim, Setiausaha Suruhanjaya Perkhidmatan Pendidikan (SPP) akan menyampaikan taklimat persediaan temu duga. Saya berharap sesi berkenaan**

akan dapat memberi sedikit gambaran kepada tuan-tuan dan puan-puan akan persediaan menghadapi temu duga sekiranya berjaya dipanggil oleh SPP kelak.

- 3. Untuk makluman semua, taklimat seumpama ini merupakan program berkala SPP yang telah dimulakan sejak 2018 yang bertujuan memberi peluang kepada pihak pengurusan Institut Pengajian Tinggi Awam (IPTA) bertemu, berbincang dan mengutarakan persoalan atau permasalahan berkaitan dengan pengambilan graduan pendidikan lepasan Universiti Awam (UA).**

- 4. Saya ingin menzahirkan setinggi-tinggi ucapan tahniah kepada Kementerian Pengajian Tinggi melalui Majlis Dekan Pendidikan Univerisiti Awam kerana mengambil inisiatif untuk mengundang SPP memberi taklimat persediaan temu duga kepada graduan dan bakal graduan Program Pendidikan Universiti Awam. Saya juga difahamkan program webinar julung kali ini telah dapat mengumpulkan lebih kurang seribu graduan dan bakal graduan Program Pendidikan daripada 13 Universiti Awam. Langkah ini dilihat sebagai langkah proaktif dalam**

memastikan graduan dan bakal graduan bidang pendidikan yang akan memasuki alam pekerjaan dapat bersedia apabila berhadapan dengan panel temu duga kelak khususnya yang berhasrat menjadi warga pendidik Kementerian Pendidikan Malaysia (KPM). Selain itu, usaha ini juga merupakan hasrat SPP dalam merakyatkan fungsi-fungsi Suruhanjaya ini supaya dapat dikenali dan difahami oleh orang awam terutama para graduan dan bakal graduan yang berminat menjadikan Sektor Pendidikan Kerajaan sebagai kerjaya mereka.

- 5. Saya juga ingin mengambil kesempatan sekali ini untuk memperkenalkan serba sedikit mengenai SPP yang merupakan Pihak Berkuasa Melantik kepada Anggota Perkhidmatan Pendidikan (APP) yang pada masa ini berjumlah lebih daripada 400 ribu orang. SPP telah ditubuhkan pada 1 Januari 1974 atas syor Laporan Suruhanjaya Diraja Aziz mengikut Fasal 1 Perkara 141A, Perlembagaan Persekutuan yang berfungsi dalam urusan pelantikan, pengesahan dalam perkhidmatan, kemasukan ke dalam perjawatan tetap atau berpencen, kenaikan pangkat Ketua Pengarah Perkhidmatan Pelajaran dan**

kawalan tatatertib. SPP yang terletak terus di bawah YAB Perdana Menteri dan bertanggungjawab ke atas Jabatan Perdana Menteri dapat saya simpulkan satu-satu agensi yang mempunyai kuasa *Hire and Fire* bagi APP.

Hadirin yang dihormati sekalian,

6. Berdepan dengan situasi semasa, isu berhubung panggilan temu duga dan pengambilan APP sering menjadi perdebatan. Terus terang saya katakan, walaupun seseorang graduan yang mempunyai ikhtisas dalam pendidikan tidak semestinya akan menjawat jawatan dalam perkhidmatan pendidikan. Ini kerana dengan faktor lebih penawaran, bakal graduan Universiti Awam (UA) juga akan bersaing dengan graduan pasaran terbuka. Justeru, sesi taklimat ini bukanlah pemutus bahawa graduan akademi ini akan terus mendapat tempat dalam perkhidmatan pendidikan tapi lebih kepada persediaan sebagai calon temu duga agar mempunyai pakej lengkap. Melalui sesi ini, graduan akademi ini akan mempunyai kelebihan berbanding

dengan graduan-graduan dari Universiti Awam yang lain sekiranya berhadapan dengan Panel Temu duga kelak.

7. Saya percaya, taklimat yang akan disampaikan sebentar nanti dapat memberikan sedikit gambaran tentang persaingan dan keadaan sebenar yang bakal dihadapi para graduan di dalam bilik temu duga. Apa yang penting, suka untuk saya ingatkan para graduan agar perkemaskan keterampilan diri dan sikap, dalami pengetahuan am, isu semasa pendidikan. Graduan juga perlu sentiasa tingkatkan keupayaan berfikir, kemahiran berkomunikasi dan pengetahuan bidang tugas serta ikhtisas supaya setiap seorang daripada anda semua akan diperakukan sebagai Pegawai Perkhidmatan Pendidikan (PPP) atau Pegawai Pendidikan Pengajian Tinggi (PPPT).

8. Sesi temu duga yang akan dilalui oleh para graduan akademi ini nanti merupakan langkah pertama sebelum diterima masuk menjadi warga pendidik lantikan tetap yang akan berkhidmat secara purata 30 tahun dalam Sektor Pendidikan. Suasana ini sangat berbeza jika

dibandingkan semasa para graduan terlibat dengan praktikal khususnya ditahun akhir. Oleh itu, saya sarankan supaya lengkapkan diri anda dari aspek mental dan fizikal sebaik sahaja berjaya dan ditempatkan oleh KPM di mana-mana sekolah di seluruh negara. Ingin saya tegaskan, tugas pendidik adalah tugas mulia dan ia menjadi mudah dilaksanakan jika graduan menghayati dan menjiwai (*passion*) kerjaya tersebut. Insyallah.

Hadirin yang dihormati sekalian,

9. Pelaksanaan beberapa siri Perintah Kawalan Pergerakan (PKP) bermula awal tahun 2020 oleh Kerajaan sedikit sebanyak telah menjejaskan urusan pengambilan terutamanya urusan temu duga yang tradisinya dilaksanakan secara bersemuka. Justeru, bertitik tolak daripada itu, SPP telah memperkenalkan dan menggunakan kaedah baharu iaitu temu duga secara rakaman dan persidangan video bagi memastikan urusan pengambilan terus dapat dilaksanakan walaupun dalam tempoh yang sukar ini.

10. Kaedah baharu ini amat membantu SPP dan dalam masa yang sama dapat mengelakkan penularan COVID-19 di mana calon-calon tidak perlu hadir dan berkumpul di sesuatu tempat serta tiada pertemuan secara fizikal berlangsung.

11. Untuk rekod, bagi sepanjang tahun 2020, seramai 19,563 orang calon pelbagai jawatan telah melalui kaedah temu duga baharu ini. Daripada jumlah tersebut, seramai 5,251 orang telah dilantik ke perkhidmatan pendidikan termasuk 2,998 orang untuk jawatan Pegawai Perkhidmatan Pendidikan Gred DG41 (PPP DG41).

Hadirin yang dihormati sekalian,

12. Melihat situasi semasa dengan pandemik COVID-19 masih menular semestinya memberi kesan kepada penyampaian perkhidmatan SPP. Mana tidaknya, pelbagai perancangan yang telah dibuat terpaksa diubah dan ditangguhkan bagi mematuhi peraturan-peraturan semasa yang di ditetapkan oleh Kerajaan. Namun, SPP tetap berusaha memastikan bekalan sumber manusia dapat terus

dibekalkan kepada agensi-agensi yang berkenaan agar kekosongan jawatan dapat diisi.

13. Sehingga akhir Julai 2021, SPP telah melaksanakan beberapa urusan pengambilan pelbagai jawatan termasuk pengambilan PPP DG41 seramai 1,986 daripada calon universiti awam dan 145 orang Pegawai Pendidikan Pengajian Tinggi Gred DH41 (PPPT DH41).

14. Terkini, SPP sedang memproses permohonan Pengambilan Khas Pegawai Perkhidmatan Pendidikan Gred DG41 Secara One-Off bagi Tahun 2021 yang telah diiklankan pada 7 Julai hingga 21 Julai yang lepas. Sebanyak 40,000 permohonan telah diterima daripada graduan dan bakal graduan pendidikan dan ini melebihi jangkauan SPP. Saya percaya ada dalam kalangan peserta taklimat hari ini yang turut memohon dan saya ucapkan selamat berjaya. Pesanan saya, hayatilah taklimat yang akan disampaikan untuk persediaan dan persiapan menghadapi sesi temu duga yang akan diadakan kelak.

Hadirin yang dihormati sekalian,

15. Saya berharap inisiatif yang diambil oleh Majlis Dekan Pendidikan Universiti Awam ini akan berterusan di tahun-tahun mendatang dalam usaha mempersiapkan graduan fakulti pendidikan untuk menjadi calon yang lebih kompeten apabila dipanggil sebagai calon temu duga kelak. Taklimat yang akan diberikan sebentar lagi seharusnya diamati agar anda semua benar-benar bersedia semasa temu duga seterusnya berjaya dilantik sebagai Pegawai Perkhidmatan Pendidikan atau Pegawai Pendidikan Pengajian Tinggi.

16. Harus diingat ilmu yang ditimba semasa sepanjang sesi pengajian perlu seimbang dengan *soft skills* agar PPP atau PPPT yang memasuki perkhidmatan benar-benar layak dan berkualiti, seterusnya dapat menyumbang ke arah kemenjadian murid dan pelajar di sekolah-sekolah mahupun di institusi-institusi pendidikan yang lain.

17. Akhir kata saya dengan ini mempersilakan YBrs. Encik Md Radzi bin Hashim, Setiausaha SPP untuk meneruskan

**Program Webinar Kerjaya bersama Suruhanjaya
Perkhidmatan Pendidikan (SPP) ini. Silakan.**

Sekian, terima kasih.